


涇川詩話





話 詩 川 涇

著 希 知 趙

編主五雲王

編初成集書叢

話詩川涇

中華民國二十六年六月初版

著者 趙 知 希

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

※E八三四

長

(本書校對者黃逸之)

涇川詩話卷上

清 環石趙知希著

吾涇有明前輩。究心理學。多不專以詩名。自王巖潭乾延與吳中皇甫兄弟唱和。頗有所興起。萬歷間。里人

張東山應泰取唐許文化以下至於同時諸君子詩。纂爲里音。而本朝侯晉水世權來蒞吾涇。取里音而廣之。

續之爲賞音。於是千有餘年之詩。備於此冊。徐崐山開爲之序。書成。晉水作詩以紀其盛。詞云。爲吏每苦

拙。日懷山水盟。撫茲卷帙存。披尋適所性。雞壇恣筆戰。白也稱敵勁。古人猶未遠。同堂可考證。好音集泮

林。志欲化其貌。五斗絆此身。汗焉愧陶令。猷州人物好。大雅如可并。精者擷其奧。糟者亦與迸。心理足默

運。誰謂年代更。東山稱物望。簡編留氏姓。奎文集川西。樂羣應有慶。憑仰毛葩傳。卜言實勳盛。

萬道瑞西源詩草裕佑著序云。四十年前。涇上專詩者僅數家。老幹如趙君叔厚崇禮。穠麗如王君雲從雲龍。全

聲以風騷自命。後得翟君伯誨尚忠。孤潔之性。宏放之才。又後得查君子美。懿秀色逸情。從選得力。又胡君

伯承世及。遺余新吟。而知髦年老宿。手攬宗風。信一邑之冠冕。今十年之內。五君子者。後先物故。猶幸隣友

有椒衍魯文蕃。仲則魯倚孝。家庭有伯兄平山萬應隆。從叔右文萬斌。相與倡予和爾。訂舊哦新。差不寂寞耳。道瑞

名麟所著有松虬詩草。自明季及國初以來，吾涇詩人頗萃於此。序所云矣。

余曾祖維生公，當明季時，與同邑萬道吉、宣城沈眉生壽民及家雪度初浣等倡爲南社。後合於吳爲應社。又

謂之復社。以制藝爲同社所推，而詩古文尤不懈而及於古。今所傳有欽閣詩草。晉水侯公序曰：涇之趙大宗也，其先有朴菴旋夫，洪泉行吾中，宇以德諸公。而董五城、左東井、王巖潭、張東山諸前輩，又其地所產也。一代人文之鄉，流風餘韻，猶有存者。涇雖僻邑，殊多名蹟。如水西幕山之奇，承流翠溪之勝，維生攜同人而府和之，奚囊所積，遂以盈帙。大都命景抽靈，匠心軌括，抒奇碩磊落之抱，而調以淵懿渾灝之氣，翩翩超先達而上之。蓋深有得於性情之正者。觀晉水之論，足以知所詣矣。

萬道吉與先維生公交最篤，嘗爲作詩文合序云：予交天下士甚侈，所謂固之以盟誓，重之以婚姻者，宣城沈眉生、同邑趙維生而已矣。維生公別墅在城東，地名甄塘，而萬所居眉生榜其門曰世夫子里。萬丘爲道

吉之祖李白嘗稱之爲萬夫子故云

天都邵漆夫晃投以詩云：我家天都峯，僻居罔與比。小築瀾香亭，雅聞足音喜。一旦良朋會，同志俱鵲起。始因扶風豪，獲覩連城美。今來涇城東，雪山追屐齒。徙倚甄塘間，脈脈一水裏。同訪玉屏園，遙瞻夫子里。如何素心人，天涯隔尺咫。

南社初起，萬道吉嘗爲主盟。甲乙以後，道吉居山尙數十年，有先後遙祭夏彝。仲陳臥子、吳日生、黃蘊生、侯澹道諸詩，其七十初度一律，傷知交之零落，感時事之盛衰，蓋老而見道，自悔自喜，真不朽之名言也。

詩云。憶昔清高。妄自尊。公卿折節。徇虛論。晚知此道能亡國。何敢今時尙署門。齊轂自然辭暮市。魯戈曷久駐朝暉。平心檢點。盈虧事。草說當年八愷元。

道吉以古文崛起。爲同社所宗。而其弟道瑞。麟詩特蘊藉。過於其兄。貴池劉伯宗。城嘗曰。重瑞高逸。冲融比諸乃兄。亦猶惠連之與靈運。邵漆夫亦云。當時四海一子由。可以舉語。然道瑞豪邁自喜。意蓋不僅欲以詩文名。觀其擬古數章。可以知其志矣。一章云。客有萬里行。相逢下車揖。笑譚無俗姿。奄然長大息。拊髀爲予言。挾策詣燕北。上多媚嫉臣。下多縱橫賊。時沈周生被徵二章云。每悲夙昔人。慷慨持所願。攬轡矢澄清。

枕戈以待旦。誰當長伏櫪。所志委秋蔓。功名曷足道。獨此民塗炭。其四章云。白日蔽江雲。憂來不可待。駕言清河涘。我馬亦已瘵。秋水澹芙蓉。美人阻中隄。仰見黃鵠飛。飛去尋江海。其六章云。乘鷺駟玉虬。呼吸三千丈。濯纓弱水中。倚劍若木上。何以調渴飢。瓊樹有瀝沆。攝氣得還元。冲漠游至廣。浦上徐道潔。濯云次第讀之。可以言騷。非虛論也。

道瑞五言。有小橋臨淺瀨。流水伴孤村。滄雲封半榻。移月怯孤峯。七言有唱徹漁歌深極浦。敲殘梵磬到前洲。濁酒掩關天下事。素書支屋古人心。並清遠有致。蓋老而閉門。無復少時之豪氣矣。

秀水高寓公。宰涇有惠澤。後其子佑鈺。

字念祖

來涇。桐城方爾止。文贈之以詩。兼呈萬道吉云。歲暮風雪寒。

高生來自越。假館青溪傍。棲遲未旬月。又欲泝大江。孤帆待明發。言過牛渚西。桃花潭始歇。先公昔爲宰。恩澤沁人骨。至今四賢祠。俎豆猶馨醇。君往拜其下。仰首瞻崇碣。父老皆來觀。進酒供殽核。新令苟賢者。

感動念存歿。分金潤行李。諒不忍輕忽。況君富才藻。逸氣凌溟渤。雅游在山水。匪直事干謁。舊交有萬叟。岩居采薇蕨。冒雪尋訪之。松窗燔楮。爲我寄相思。數年音問缺。按寓公當祀於涇。今入名宦。但涇無所謂四賢祠者。恐屬傳聞之誤。姑識於此。以俟知者。

張載述爲諸生時。以布衣而慨然有憂天下之志。嘗累上當事書。皆不果用。其叔張一雛贈之以詩云。陽九適茲遘。時勢如鼎沸。皇天降機槍。罹毒遍蒼赤。殺戮何慘淒。枕藉江以北。楚衛半陷吞。豫章行告急。警報下江南。旄倪竄山谷。當事豫征輸。閭閻罄膏血。吁嗟南豐者。苛政猛於賊。罔念帝室憂。日夜恣培尅。爪牙橫鄉隅。雞犬無寧息。吾子懷骯髒。仗劍走京邑。纒纒數千言。雷轟與電掣。三上司馬門。啓讀咸辟易。九閭萬里遙。誰爲達君側。空負洛陽才。痛哭亦奚益。浩嘆吐虹光。怒成奮鯨鬣。老夫臥山中。聞之髮髭立。歷覽古史傳。英雄幾埋沒。左車計若就。准陰胡由入。徐洪言若聽。李密胡由滅。成敗本之天。緣會有時合。囑子且藏鋒。囊錐自見末。子今復遨遊。令我肝腸裂。鸞鳳日以遠。狐狸肆妖孽。努力請纓去。復筭中行說。集蓼甘多難。持滿終虞缺。所以大任人。在險表奇節。書此布區區。臨書淚哽咽。春風來好音。慰我婆心切。載述後間關入閩。爲給事中。以阻孫可望封被殺。

楊於陵奪情視師。宣城沈徵君民壽三上疏爭之。不報。乃拂衣歸。萬道吉爲之顏其所居曰。世爭奪情。沈家

蓋以沈之先殿撰君典先生。嘗爭張江陵奪情事也。鼎革後。徵君不復出山。余族伯谿叔公崇禮贈以詩云。軒后山中日似年。自堪高枕與耕田。薜蘿猶是秦人服。苔蘚全封圯叟編。林聽杜鵑時下拜。海嗟精衛竟

難填。五松小隱還嫌淺。欲擬從君臥古烟。

五松水西禪院。谿叔公常寓處也。

谿叔公書法入二王室。四方以絹素請者無虛日。偶臨池自嘲云。垂白空操筆似椽。誰將珠璣換雲烟。饒君縱得眉山價。也要遲留五百年。年年歲歲浪塗鴉。戶屢如雲鐵葉斜。莫笑鵝羊都寂寞。有時瓜葛儘盈車。

沈徵君入金華山十餘年。溧陽相國陳名夏欲薦之。專使奉書。徵君不啓封而還之。先維生公有過沈氏山莊詩云。冥鴻不受慕。宛在水雲間。孤性嘗憐鶴。清光獨占山。道由澗曲盡。門爲燕泥關。昭夢此中足。青松未改顏。謂此事也。

萬道吉云。維生嗜棋。筆墨餘閒。卽召其所睚。手談竟日。然先維生公口占云。破裘不耐寒。敗葉聊相補。閉戶敲殘枰。茫然忘舊譜。聊寓意於此耳。非嗜也。

谿叔公所居。名文燕齋。自負法書入於逸品。而不肯以詩名。一日施愚山司寇來訪。喜而有賦。得句云。窮巷應門無禪子。華裾織翠過昌黎。施大咨賞以爲不減劍南。又好寫蘭。嘗亂作荊榛叢莽。而數莖迴出。見者謂有仙氣。自題其上云。道人偶寫棘中蘭。嫩蕊無嫌信筆刪。曾讀龍門司馬史。老莊何礙合申韓。

胡相承

世及

有題蕉道人

谿叔公別號

畫蘭詩云。脫然生滅外。虛談自成陰。秋風莫敢折。立意一何深。坐臥於其

下。時見故人心。詩意亦清遠可愛。伯承爲休寧廣文之官日。谿叔公送之以詩云。清詠徧留黃白嶽。閒官徧愜墨茶鄉。林乾維柱爲之擊節。

林乾維。閩人。流寓於涇。善畫山水蘭竹。並楚楚有致。尤工畫石。谿叔公題詩云。林子青鞋四海終。雲烟長是伴孤鴻。秋來忽動關山思。五岳先移一室中。瘦骨曾餐浩劫烟。一坵蘿薜臥蕭然。點頭若問何年事。却在生公未說先。後林歸。送之以詩。有殘陽橫馬影。孤笈冷秋聲之句。林笑曰。子常謂予畫中有詩。若此。則眞詩中有畫矣。

谿叔公善病。常閉門自攝。而不廢筆札。一日。胡伯承見過。見其倚牀支几。作如箕大字。而吟詠成帙。甚都有懷。乃嘆曰。如此病。故足貴。然不節。則眞氣未免有動。因爲詩以箴曰。屏躬日病肺。對子病良已。清譚娛我心。新詩自爲體。取益在曹溪。神明日以起。秋氣來虐人。使子亦伏几。一月臥蕉齋。夢寐達知己。今茲候顏色。楚楚清骨峙。不嫌擾君靜。翻謂見我喜。銳氣帥精思。如以齊伐莒。嗟彼肉食者。無病安足擬。腸肥志不潔。逐逐如腥蟻。何當草元人。觸病養妙理。顯氣接混茫。悟中出眞斐。竟讀攝我神。煩囂頓還裏。祕此可樂饑。湘蘭與沅芷。我願子且問。息慮率曠兕。自悔出腐餘。引子芬滿齒。相期冥諸道。元室虛可徙。漸近返自然。減知以益髓。勅斷文字禪。挹彼西江水。浩然從吾初。一爲了生死。良朋之愛。情餘於言矣。

世推

侯晉水世推賞音刻成詩。以紀盛。先維生公。次其韻和之云。山水由筆慧。樂結幽人盟。芳流泛餘波。各自抒靈性。李杜倡雅先。汪許稱後勅。東山蒐百家。聲響如呼證。微言忽中絕。殘蠹橫如鏡。一筇誰相扶。墨雨洒循令。秀骨帶霞氛。絕代英華并。博搜徧林淵。珠壁有兼迸。方期古音嗣。漸覺今徽更。片字香青瑤。卿雲生氏姓。岩壑佩奇光。鶯花共誌慶。撫函扣絲竹。渺致逼唐盛。時屬和者甚衆。晉水惟首推是篇。以爲非老手。

不辦。

查石門鑪宰於鐔。有治聲。鐔州有庭柏一株。海剛峯手植。先生賦之以志遺愛云。何年翠柏老庭中。手澤猶能記海公。自是鱗姿孤映日。更無霜幹共摩空。曉鐘月上流清影。古殿香來任好風。千載長垂堂下蔭。愛留應不異巴東。詩極沉雄可喜。又南歸別友絕句云。倦遊喜發向南舟。及到帆開却轉愁。南望鄉山北望友。情同潮水去來流。情致纏綿。不愧唐音矣。

翟伯誨

忠 尚

與萬道瑞交最密。甲乙以後足不踰戶闕者十二年。偶聞道瑞在桃花渡口。乃一出見之。感而

賦云。半生痼疾是煙霞。不問迷津十載賒。偶爲杜陵懷舊雨。漫從剡曲踏晴沙。江邊魚鳥怪吾在。路上兒童識面差。已似秦人隔時世。獨憐無恙古桃花。意曲語深。覽者咸悲其志。

水西山桃花。自三寺邇迤至泉清坑。四五里之間。一望如赤城霞起。山之下有洲曰中洲。環洲皆水。居人又競以桃花植之。間以桑柳。紅綠掩映。致爲可觀。鄭樵齋過。曾爲作記。施愚山自黃山歸。遂過水西。作桃花洲詩云。褰裳凌亂流。理策遵修渚。岩梅尙餘花。溪桃紅半吐。飛霞散平疇。錦浪生別浦。雜卉旣婢媛。危亭亦森舉。林壑見山寺。鳥喧作人語。昔來粉彥會。事往餘榛莽。流目覽衆妍。登高當孤嶼。撫物歡在茲。仙源復何許。旣乃訪家谿。叔公於文燕齋。出黃遊草見示。復偕遊水西。時桃花已落。復賦詩云。渡口漁人路不迷。重來綠樹一鶯啼。風光好處傷心甚。目送斜陽下水西。

梅瞿山。清朗三先生之族子也。偶來水西。見先維生公於欹閣。追述舊誼。爲作長松踞石圖。而題詩其上。

云最愛蒼然老松樹。歲寒偏放拂雲梢。芳菲肯逐青春侶。只許梅花作素交。今藏於家。

先維生公與梅朗三交最久。故梅瞿山清耦長庚皆來修子姪之禮。二公皆善畫松。時先伯作舟公諱濟

尚

幼。追隨履齒。遂微得其妙。片楮尺紙。頗爲四方所珍。晚年倦於題識。常命予作畫松詩數十首。以待拂翰。

青陽吳七雲襄有贈句云。蒼松浩浩挺千春。攻玉齋頭掛壁新。今日扣關見顏色。不知是松還是人。

吳七雲襄常書世德流光之額。以贈先伯哲侯公。諱濟而作記曰。余昔受經於涇之桃潭數年。獲交其邑之

賢者曰趙明經哲侯。趙固涇望族也。哲侯之尊翁鍾越文學。

諱汝

謹身立德。爲鄉里所尊敬。嘗以文廟之

崇聖祠。圯廢不治。毅然獨任修葺具備。哲侯復承先緒。更新之。閭麗有加。余聞哲侯家居。孝友睦婣。任卹

諸美行。不勝紀。紀其大者。以其功在

聖門。且善繼先志也。邑之人嚮慕世德。上其事。得附祀學宮。嗚

呼。鄉先生沒而祀於社。父若子皆與焉。榮矣。哲侯子三。長曰預。以人才薦。宰於浙。次曰青藜。拔入太學。壬

子舉京闈第三。文品絕高。主司任少宰香谷善知文。嘗語余曰。京兆之役。喜得此才。季子曰希文。嗜學爲

名諸生。趙氏世積善。錫羨於後人。其代興不可量。而表揚懿美。固禮臣任焉。矧託在素交者。爰書世德流

光之額。以懸其廷。七雲微時嘗於翟村。與余老友翟非熊交最篤。故有主人多雅癖。好客復好詩之句。

又有遊彩虹岡詩云。仰天呼太白。游後今無詩。有酒不能醉。江山空自奇。語意尤嶠崎磊落也。

閨秀鄭瑾娥。鄭汝敏之女。能詩。嫁葉氏。其病中贈夫句云。一行詩就幾回愁。持贈蕭郎仔細收。他日鴛鴦

雙舞處。羅幃可憶舊時儔。施愚山先生極稱之。瑾娥所著有女紅餘誌一編。其女伴有以荷花貯膽瓶中者。瑾娥索之不允。寄之以詩。兼問其病。有云。疇昔瓶中花。妙出君之手。儂心愛莫得。燈下迴玩久。細較人與花。花與人俱瘦。偶爾動余思。持此爲問候。花顏似舊無。君恙全愈否。語尤委婉動人。

涇川詩話卷中

鄭子漢林。相如以不世之才。文壇主盟者三十餘年。著作等身。脫稿紙貴。間嘗於邑古跡。凡仕宦流寓。忠臣

義士。幽人烈婦。取其可歌可詠者。稽之史冊。徵之碑記。編爲樂府。詮註詳晰。得若干篇。非信勿傳。有美與刺。潛德之銘。光旣彰。里巷之感。發尤切。厥功偉矣。余旣屬而和之。諸同人亦皆並有篇章。煒煒煌煌。登李西崖之堂。而濟楊廉夫之貳。信巨觀也。今各取其佳者。著於此錄。而余之什亦於是附焉。亦庶幾借有韻之文章。備一邑之典故云。

漢林勇里。戰云。赤帝祚將終。羣雄起角力。孫家獅兒誰爭鋒。來平江東討山賊。丹陽僞守立屯府。大爲山越附。山塢山城塢裏鳴金鼓。一戰擒之如縛虎。解卿縛。捉卿手。不憶神亭時。曾分勝與負。卿得我。未可量。我署卿。賊曹上策馬。大咲歸中營。勇里蕭蕭風雲壯。

漢獻帝建安三年。太史慈據涇縣。孫策擊擒之於勇里。

桓嶺屯軍行云。典午趨將吼山頭。東南殺氣橫霜秋。誰表陳師糾義旅。鷹鷂逐雀聲啾啾。石碓轉戰軍不勝。退據廣德賊兵進。灑涕來屯涇谿東。憑險軍容震復震。大江以南無堅城。有客好謀僞請成。丈夫無寧歸視死。自誓肯與賊俱生。嶺頭一疊崎嶇路。傳道廷尉殉身處。年年谿上啞啞鳥。只遶忠臣墓旁樹。

晉桓彝爲

宣城內史蘇峻反。舉起兵赴難。遂屯涇縣。峻將韓晃攻涇。裨將俞縱戰死。城陷。舉死之。

石鼓山歌云。東黃崑。西白馬。石鼓屹立兩山下。山人居不聞聲。無聲誰爲鼓。擣者君不見。陳倉石鼓車。攻詩。周宣中興。史籍辭。西蜀震鼓四十里。茂先博識。桐爲魚。有畫有聲。人工爲何似。此山此石。天生形如鰲。馮唐豈愛水雲鄉。老去買宅山之旁。擊鼓召賓賓皇皇。山上無宮花滿樹。後主不畏北兵渡。擊鼓何爲狎客赴。傳說荒唐紀乘部。我信不信問石鼓。石鼓默默天不雨。青山綠水笑千古。

山在邑東。柏傳馮唐居此。擊鼓集賓客。一云陳後主擊鼓。

召賓客於比。

安吳嬰城謠云。賊臣仰射臺城江。南朝天子玉食空。風烟騰天天流虹。青絲白馬兒氣餒。何洵洵。宣州不服飛流矢。安吳城帶涇川水。內史嬰城抗其鋒。賊帥來攻賊旗靡。賊旗靡。馬上郎邀黃塵起。時移物換幾千年。渡口誰家村樹烟。守城遺壘成荒田。落星潭上蒼狗眠。劍氣猶壓藍山尖。

梁大寶初。宣城內史楊白華。不附侯景。進據安吳。景遣于子悅等帥

衆攻之。不克。

香心娘歌云。唐季起草竊。逆氛流宣歙。岬岬江淮衝。女子一腔血。寸鐵當前甘就飴。骨燬身灰心不滅。心不滅。十里芬馥香如雪。同時長安僞妃嬪。果頭敗後俘金闕。九重怒責衣冠子。紅顏不伏詞喋喋。滿廷臣賊渾閑事。君王莫問奴失節。金魚朝官僵且啞。私怪彼婦何大黠。古今大義知者難。誰能獨伸天地間。置

身何等嗤人污。鬚眉巾幘兩無顏。君不見涇之水。香心娘。清氣吹不散。化作冰與霜。

梅氏五娘。洪勝可妻。黃巢賊兵逼梅。誓死不從。引刀

自刺死。心香數日不斷。邑人祠祀。號香心五娘。

胡彬仲

承璚

台泉雲龍歌云。台山高。台泉清。天地開闢。山有靈。龍爲師。雲爲弟。講學深。柳文星聚。文星聚處。

三台光。列宿熒熒照廟廊。我來登山雲門開。書屋無人長莓苔。蹲踞怪石吼人來。雲龍隱現越觀臺。

明嘉靖間。

許文穆國讀書台泉山。一時從遊俱登巍科。爲列卿。時稱九進士。其齋讀處名雲龍書屋。

翟堯仙偈。猷州刺史歌云。錦帆殿。腳楊州樂。瓊花觀裏楊花落。太原公子楊裘來。羣雄次第塵氛廓。猷州

刺史亦英雄。早識天命欣所託。妖氛一旦徧東南。獨拒危城當鎖鑰。嗟爾小醜敢紛紛。轉戰丹楊鷗逐雀。

功成拂衣朝天去。英名好配褒與鄂。

隋大業末。左難當據涇。六年降唐。授猷州刺史。七年輔公祐反。圍猷州。難當嬰城自守。會李大亮兵至。合擊破之。

翟泉初涓。虞翻戊云。文臺眞英雄。伯符稱人子。可憐吳王權。亦是豚犬耳。不爲臣魏羞。却抱受諫恥。而使

虞翻至於此。

虞翻仕吳爲騎都尉。數犯顏諫。諍吳王不悅。坐徙丹陽涇縣。

遺民把釣吟云。五斗不折腰。一竿可避人。水西白雲灘。灘上劉遺民。柴桑一官何足云。掀天貴富如過塵。

贏得釣臺高入雲。

劉程之嘗爲柴桑令。後棄官釣魚於水西白雲灘上。

桃潭送客行云。願爲潭上雲。片片逐客舟。願爲潭中水。點點隨舟流。汪倫不作萬巨死。客不來兮我心憂。
李白客涇縣。有桃花潭水深千尺。不及汪倫送我情之句。

廿一弟然乙琴高曲云。涇川城北秦溪峯。下有一洞開玲瓏。道是秦高脩煉處。丹成御鯉培天風。我來訪古心忡忡。茫茫墜緒堙虛空。秦皇漢武誤今古。至今海上謗瀛蓬。君不見琴溪之山茹可採。琴溪之水鮮可膾。籀龍爭地上干霄。秋月春花勝事在。會凌絕頂嘯雲天。瑣瑣何須問藥滓。
琴高居涇北二十里山岩。修練道成。控鯉上昇。其所遺藥滓化小魚。

每歲上巳土人爭取之。

桓嶺屯軍行云。東漢聲鐘鼓。節義冠今古。漸滅茲氣盡。當塗禪典午。清談誤我士大夫。執鄙吝者其誰乎。天心不隨天運剝。內史桓公裨將俞。江東妖氛侵山城。內史力掃屯吾涇。命俞將軍山頭戍。於今山錫桓公名。嗚呼一木支大廈。降賊多識時務者。男兒死耳甘同心。滿腔劍血冬青下。將軍如水公如源。春酒社鼓來荒村。賊已褫魄浩氣存。連呼殺賊起陶溫。

桃花潭送客行云。桃花潭上花如焚。潭外斜飛一片雲。片雲飛起不肯下。悠悠誰是汪倫者。踏歌古岸人無語。獨泛扁舟送花雨。

水西講學謠云。涇水之西講堂開。一時學者轟如雷。入主出奴齊嘖嘖。揚波鼓浪姚江來。江之學金谿是。暗主禪宗排朱子。朱子早年亦入禪。特編定論清真似。世上誰識一塊金。改頭換面陽明祀。吁嗟乎。儒釋